

Ўзбекистан Республикаси Олий ва ўрта махсус таълим вазирининг 26 октябр 2016 йилдаги 444 сонли “Олий таълим муассасаларида абитуриентларни тайёрлов курслари фаолиятини ташкил этиш тўғрисида” ва Тошкент тиббиёт академиясининг 2017 йил 29 мартдаги 175 сонли буйруғи ҳамда Тошкент тиббиёт академияси низоми асосида тузилди.

Тошкент тиббиёт академияси тасарруфидаги тайёрлов курсининг

Н И З О М И

1. Умумий қоидалар.

1.1 Тошкент тиббиёт академияси қошидаги тайёрлов курси давлат таълим стандартларига мос равишда, тингловчиларнинг қизиқиши, хохиши ва имкониятларидан келиб чиқиб, уларни мутахасисликларга йўналтирган ҳолда кириш имтихонларига тайёрлаш, шунингдек уларнинг интеллектуал ривожланишини таъминловчи ўқув муассасасидир.

1.2 Тайёрлов курси “Таълим тўғрисида”ги қонун, “Кадрлар тайёрлаш миллий дастури”, “Ўрта махсус, касб-хунар таълими ҳақидаги Низом”га, Тошкент тиббиёт академиясининг устави ва бошқа таълим соҳасидаги меъёрий ҳужжатларга мувофиқ, равишда ўз фаолиятини амалга оширади.

1.3 Тайёрлов курси Тошкент тиббиёт академияси таркибида фаолият кўрсатувчи мустақил, бирламчи, хўжалик ҳисобидаги ташкилот ҳисобланиб, Тошкент тиббиёт академиясининг муҳридан, штампидан фойдаланади. Номи ёзиғлик (осма) лавҳасига ва бошқа реквизитларига эга бўлади.

1.4 Тайёрлов курси Тошкент тиббиёт академияси қошидаги моддий техник базадан бошқа тузилмалар билан бир қаторда тенг ҳуқуқ асосида фойдаланади ва ушбу базани ўзига тегишли қисмини сақлайди, мустахкамлайди ва ривожлантириш тадбирларини амалга оширади.

1.5 Тайёрлов курси ўзига тушган маблағлардан рационал ва самарали фойдаланишни назорат қилади.

2. Тайёрлов курсининг мақсад ва вазифалари.

2.1 Тайёрлов курсининг асосий мақсади. Олий ўқув юртига киришни хоҳлаган ёшларни йилдан-йилга такомиллашиб бораётган тест тизими саволларига тўлиқ жавоб беришга тайёрлаш ва уларда ўрта таълим тизимида тўлиқ шаклланишга улгурмаган билим усулларини такомиллаштириш, уларда яшириниб ётган ижодий қирраларни ривожлантириш ва сифатли билим бериш йўли билан тингловчиларни жисмоний, маънавий ва эстетик ривожланишига ҳисса қўшиш.

2.2 Тайёрлов курсининг вазифалари:

- тингловчиларни билими, кўникмаси, мақсади ва тушуниш қобилиятига кўра гуруҳларга ажратиш;
- тингловчиларда ижодий дунёқарашни шакллантириш, уларни интеллектуал фаолиятини фанлар бўйича йўналтиришда кўмаклашиш;
- Олий ўқув юртларига кириш учун тингловчиларда етарли билим кўникмаларини ҳосил қилишда ёрдам бериш;
- фанлар бўйича тест мисол ва масалаларни энг қисқа йўллар билан ечишга ўргатиш;
- тингловчиларда ўзларининг билимига ишонадиган сифатини шакллантириш ва ривожлантириш;
- узлуксиз таълим тизимидаги ватанпарварлик туйғусини тингловчиларда ривожлантириш ва халқимизнинг миллий, маънавий, маданий анъаналарига ҳурмат билан қарашни кучайтириш.

3. Тингловчиларнинг ҳуқуқ ва мажбуриятлари.

- тайёрлов курсига тингловчилар шартнома асосда қабул қилинадилар.

Шартномалар икки томонлама (ТГА ва тингловчи) ёки уч томонлама (ТГА, корхона, тингловчи) бўлиши мумкин. (Илова 1)

— тайёрлов курсига Ўзбекистан Республикаси фуқаролари ва мавжуд Қонун ҳужжатларига мувофиқ равишда чет эл фуқаролари ҳам қабул қилиниши мумкин.

— тайёрлов курси тингловчиларни билимига асосан махсус гуруҳларда ўқишини ташкил қилади.

3.1 Тингловчилар:

— ўзлари ҳоҳлаган тилда (ўзбек ва рус) ва гуруҳларда (маъмурият билан келишилган ҳолда) ўқиши;

— академия биносидаги ўқув хоналари, лабораториялар, кутубхоналардан фойдаланиши;

— ўқув режасидан ташқари келишилган ҳолда қўшимча билим олиши;

— фанлардан ўзига мосини танлаб олиш ва қонунда кўрсатилган меъёрий ҳужжатлар асосидаги имтиёз ва ҳуқуқларга эгадирлар:

3.2 Тингловчиларнинг мажбуриятлари:

— шарномада кўрсатилган контракт тўловини ўз вақтида амалга ошириш;

— академияни ички тартиб қоидаларига, уставига бўйсунуш;

— академия биносида хушмуомалали, маданиятли бўлиш;

— академия мулки (жихозлар, ўқув қўлланмалари, китоблар, асбоблар)га эҳтиёткорлик билан муносабатда бўлиш, уларни сақлаш:

3.3 Тингловчиларга белгиланган намуна асосида тайёрлов курсининг гувоҳномаси берилади.

3.4 Сабабсиз 2 ҳафта қатнашмаган ёки Академияни ички тартиб қоидаларига риоя қилмаган тингловчилар ўқишдан четлаштирилади.

3.5 Тингловчининг айби билан ўқишдан четлаштирилса, ўқиш учун тўланган тўлов тингловчига қайтарилмайди.

4. Ўқув-тарбиявий жараёнини ташкил этиш.

4.1 Ўқув-тарбиявий жараённинг мазмуни Давлат умумтаълим стандартларида ишлаб чиқилган ўқув режалар ва дастурлари асосида белгиланади.

4.2 Гуруҳлардаги тингловчилар сони 12 дан ошмайди (амалий машғулотларни ўтишда гуруҳ икки кичик гуруҳга бўлиниши мумкин). Тил ўргатиш гуруҳларида талабалар сони 6-8 кишидан ошмайди.

4.3 Ўқув жараёни илғор педагогик технологиялар асосида ташкил этилади.

4.4. Ўқув машғулотларини олиб боришга Академияни юқори малакали ўқитувчи-профессорлари жалб қилинади.

4.5 Ўқув гуруҳларида дарсларнинг бошланиши ўқув гуруҳларини ташкил бўлишига боғлиқ бўлиб, дарс ўтиш учун ўқув режалари шунга мос равишда танланиб олинади:

4.6. Қисқа муддатли ўқув гуруҳларида ўқитиш интенсив мукамаллашган технологиялар асосида олиб борилади.

4.7. Ўқув жараёни ташкил қилиш умумий режа ва ўқитувчининг танлаб олган усули асосида олиб борилади.

4.8. Дарс тузилмаси қисқа назарий ва амалий тест масалаларини ечишдан иборат бўлади.

4.9. Тингловчиларнинг билим даражаси махсус тест-вариантлар ёрдамида текширилиб борилади.

4.10. Якуний тестда тингловчиларнинг билим даражаси (рейтинги) аниқланади.

4.11. Тайёрлов курсида тартиб-интизом педагоглар ва тингловчилар ўртасидаги самимий муносабатлар, ўзаро ҳурмат, маданий-муомала асосида ўрнатилади.

5. Тайёрлов курсининг педагог ходимлари ва хизматчилари.

5.1. Тайёрлов курсига педагог сифатида ишга соатбай асосида махсус олий маълумотга эга бўлган Академиянинг олий малакали ўқитувчилари Академияда ўрнатилган тартибда қабул қилинади.

5.2. Ишловчиларнинг ҳуқуқ ва мажбуриятлари, ҳақ тўлаш ва ишни ташкил қилиш шароитлари Ўзбекистон Республикасининг меҳнат кодекси ва тайёрлов курсининг штат жадвалига кўра амалга оширилади.

5.3. Тайёрлов курси педагогик ходимларининг вазифалари:

— ўқув жараёнини юқори даражада ва сифатли бўлишини таъминлаш;

— тингловчиларда танлаган йўналишларига қизиқишни кучайтириш;

— тингловчиларда мустақил фикрлаш, ечимни қисқа йўллар билан топиш, тез фикр юритиш, жавоблардан фойдаланиш орқали ечиш, таққослаш, олдинги натижадан фойдаланиш каби бир қатор кўникмаларни ҳосил қилиш;

— тингловчиларга ўргатилаётган фан йўналишларидаги билимларини чуқурлаштиришга ёрдам бериш;

— махсус ўқув дастури, илғор ўзига хос педагогик технологияларни яратиш;

5.4. Тайёрлов курси ўқитувчилари қонундаги мавжуд имтиёзларга эга;

5.5. Ёрдамчи техник ходимларнинг ҳуқуқ ва вазифалари тайёрлов курси бошлиғи томонидан Академия ректори билан келишилган ҳолда тасдиқланган йўриқномалар ва ички тартиб қоидалар асосида белгиланади;

6. Тайёрлов курсини бошлиғи.

6.1. Академия қошидаги тайёрлов курсини бошқариш яққараҳбарлик, демократия, ўз-ўзини бошқариш ва ошқоралик принциплари бирлигида амалга оширилади;

6.2. Тайёрлов курсини бошқариш тайёрлов курси раҳбари, тайёрлов курси ўқитувчилари, Академияда ташкил топган Ректорат Кенгаши орқали амалга оширилади. У:

— тайёрлов курси тараққиётининг асосий йўналишлари, ўқув сифатини ошириш ва такомиллаштириш, моддий техник базасини мустаҳкамлаш, таълим мазмунининг турли шаклдаги (ўқув режаси, дастури, қўлланмалари), педагогик тажрибани илғор кўринишларини қўллаш, тингловчилар фикрини ҳисобга олган ҳолда ўқув жараёнини ривожлантириш каби ишларни бажаради;

6.3. Тайёрлов курсининг умумий фаолиятини бошқариш курс раҳбари томонидан амалга оширилади. Раҳбар мазкур соҳа бўйича олий маълумотли ва педагогик тажрибага эга бўлган мутахассислар ичидан Академия ректорининг буйруғига асосан тайинланади.

6.4. Тайёрлов курси раҳбари:

— ўқув муассасаси доирасида ҳамма ходимлар ва тингловчилар учун мажбурий бўлган буйруқ ва кўрсатмалар беради;

— академия ректори, маъмурияти билан келишилган ҳолда штатда кўрсатилган ходимларни ишга олишга ва ишдан бўшатишга тавсия қилади.

— ўқув жараёнини режалаштиради ва ташкил этади, унинг бажарилиш натижаси устидан назорат қилади.

6.5. Тайёрлов курси раҳбарининг ҳуқуқлари:

— фанлар бўйича ўқув режаларни муваффиқлаштириш кенгашига тақдим қилиш, ўқув режасига ўзгартиришлар киритиш, тингловчиларни фанлар бўйича билимларини текшириш шакллари аниқлаш, тайёрлов курси эҳтиёжига зарур бўлган жихозлар ва бошқа моддий-техник ресурсларни бошқа ташкилот ёки тадбиркорлардан пул ўтказиш йўли билан харид қилиш, бухгалтерия ва статистик ҳисоботни олиб бориш, фаол меҳнат қилган ўқитувчи-ходимларни рағбатлантириш (моддий ёрдам, мукофотлар уюштириш), зарур бўлганда уларга нисбатан жазо чораларини кўриш, бошқа муассасалар билан шартномалар тузишни ташкил қилиш.

7. Тайёрлов курсининг мулки ва воситалари.

7.1. Тайёрлов курсини молиялаштириш қуйидаги маблағ ва воситалар орқали белгиланган тартибда амалга оширилади:

- тингловчилардан тушган контракт тўловлар;
- юридик ва жисмоний шахсларнинг ихтиёрий хайр-эхсон ва мақсадли бадаллар ва тўловлари;
- академияни бюджетидан ташқари ажратилган маблағлар.

7.2. Тайёрлов курсининг молиявий воситалари тўла ўзининг қарамоғида бўлади, мусодара қилинмайди, тайёрлов курси ундан белгиланган тартибда фойдаланади.

7.3. Ходимларга ҳақ тўлаш Академияда амал қилаётган меъёрий ҳужжатлар асосида, меҳнатнинг реал қийматини ҳисобга олувчи коэффицентларга кўпайтирилган ҳолда ва тайёрлов курсининг молиявий аҳволидан келиб чиқиб белгиланади.

7.4. Тайёрлов курсида ходимларни мукофотлаш уларга кўшимча устама ҳақ тўлаш тартиби Академиянинг Иқтисодий Кенгаши томонидан белгиланади ва курснинг жамғармасидаги маблағлардан тўланади.

7.5. Академия маъмурияти тайёрлов курсини ўқув ва зарур маъмурий хоналар, техник таъминот, алоҳҳда ҳисоб рақами, ўқув асбоб-ускуналари, мулк рўйхати билан таъминлайди.

7.6. Меҳнатни муҳофаза қилиш, тайёрлов курси ходимларига маиший хизмат кўрсатиш Академиядаги масъул шахслар томонидан амалга оширилади.

7.7. Тайёрлов курси “Низоми”да белгиланган тартибда ўқув жараёнини ташкил қилади, бухгалтерия ҳисобини юритади.

7.8. Тайёрлов курсининг фаолияти тасдиқланган молия-хўжалик сиёсати орқали амалга оширилади.

8. Халқаро ҳамкорлик

8.1. Академия қошида ташкил этилган тайёрлов курси Академиянинг халқаро алоқалар бўлими орқали турли ташкилотлар билан халқаро алоқалар ўрнатишга ҳақли.

8.2. Тайёрлов курси Академия маъмурияти орқали хорижий таълим муассасалари билан ўз соҳасига алоқадор таълим бўйича битим тузиши, халқаро минтақавий ташкилотлар фаолиятида белгиланган тартибда иштирок этиши мумкин.

“Низом” Тошкент тиббиёт академиясининг Илмий Кенгашида тасдиқланган.

2017 йил 29 март